



REPUBLIKA E SHQIPËRISË
KËSHILLI I MINISTRAVE

PROJEKTVENDIM

Nr._____, datë __.__.2025

PËR

**MIRATIMIN E RREGULLAVE MBI PROCEDURAT E KONKURRIMIT
PUBLIK PËR DHËNIEN E AUTORIZIMEVE INDIVIDUALE PËR TË
DREJTAT E PËRDORIMIT PËR FREKUENCAT**

Në mbështetje të nenit 100 të Kushtetutës, pikës 3 të nenit 76, të ligjit nr. 54/2024, “Për komunikimet elektronike në Republikën e Shqipërisë”, Këshilli i Ministrave me propozimin e zëvendëskryeministrit dhe ministër për Infrastrukturën dhe Energjinë,

VENDOSI:

1. Miratimin e rregullave të zhvillimit të konkurrimit publik, për dhënien e autorizimeve individuale për të drejtat e përdorimit për frekuencat, sipas tekstit, që i bashkëlidhet këtij vendimi.
2. Ngarkohet Ministria e Infrastrukturës dhe Energjisë, dhe Autoriteti i Komunikimeve, Elektronike dhe Postare për zbatimin e këtij vendimi.
3. Vendimi i Këshillit të Ministrave Nr. 1252, datë 10.9.2008 “Për miratimin e rregullave të zhvillimit të tenderit publik për dhënien e së drejtës së përdorimit të frekuencave” i ndryshuar, shfuqizohet.

Ky vendim hyn në fuqi pas botimit në Fletoren zyrtare.

KRYEMINISTRI

Edi RAMA

RREGULLAT
MBI PROCEDURAT E KONKURRIMIT PUBLIK PËR DHËNIEN E AUTORIZIMEVE
INDIVIDUALE PËR TË DREJTAT E PËRDORIMIT PËR FREKUENCAT

KREU I
DISPOZITA TË PËRGJITHSHME

Neni 1
Qëllimi

Qëllimi i këtij dokumenti është përcaktimi i rregullave për procedurën e konkurrimit publik për dhënie e autorizimeve individuale për të drejtat e përdorimit të frekuencave në Republikën e Shqipërisë.

Neni 2
Fusha e Zbatimit

Ky dokument zbatohet për procedurën e konkurrimit publik, të zhvilluar nga Autoriteti i Komunikimeve Elektronike dhe Postare (AKEP) për dhënie e autorizimeve individuale, për përdorimin e spektrit të frekuencave në rastin e kufizimit në numër të drejtave të përdorimit të frekuencave sipas parashikimeve në nenin 75, të ligjit nr. 54/2024, “Për komunikimet elektronike në Republikën e Shqipërisë”.

KREU II
ORGANIZIMI I PROCEDURËS SË KONKURRIMIT PUBLIK

Neni 3
Vendimi për Kufizimin e të Drejtave të Përdorimit

1. Kur Autoriteti i Komunikimeve Elektronike dhe Postare (AKEP), në zbatim të nenit 75, të ligjit nr. 54/2024 “Për komunikimet elektronike në Republikën e Shqipërisë”, vlerëson se interesi për një brez të caktuar frekuencash mund të tejkalojë disponueshmërinë e frekuencave në këtë brez dhe për të siguruar përdorimin efikas të tyre, zhvillon procedurën e konkurrimit publik për dhënie e autorizimeve individuale, për të drejtat e përdorimit të frekuencave me një numër të kufizuar sipas këtyre rregullave.
2. AKEP, përgatit propozimin për Ministrin vetëm pasi ka zhvilluar një proces konsultimi publik me palët e interesuara i cili përfshin të gjithë elementët e parashikuar në pikën 6, të nenit 75 të ligjit nr.54/2024. Propozimi i AKEP për kufizimin e të drejtave të përdorimit

përmban arsyet e qarta për kufizimin e të drejtave të përdorimit.

3. Konsultimi publik përfshin marrjen e opinionit të paleve të interesuara sa i përket:
 - a) brezin apo brezat specifike të frekuencave si dhe ndarjen e tyre në lote;
 - b) llojin e propozuar të konkurrimit publik (*ankandit*) dhe një vendim të arsyetur të detajuar për zgjedhjen e tij bazuar në objektivat e konkurrimit publik;
 - c) çmimin rezervë të propozuara për çdo brez ose lot spektri;
 - d) çdo kufi të vendosur mbi sasinë maksimale të spektrit për një ofertues ose pjesën e rezervuar të spektrit të propozuar për të promovuar konkurrencën;
 - e) kriteret e pranimit për pjesëmarrje;
 - f) kushtet dhe detyrimet e propozuara që do t'u bashkëngjiten të drejtave të përdorimit;
 - g) një afat kohor paraprak për procesin e konkurrimit publik.
4. Ministri pas shqyrtimit të propozimit të AKEP, dhe verifikimit të përputhshmërisë me kërkesat ligjore dhe objektivat e përgjithshme politike të përcaktuara në nenin 5, të ligjit Nr. 54/2024, miraton propozimin e AKEP dhe urdhëron fillimin e procedurës së konkurrimit publik.
5. Miratimi për fillimin e procedurës do të jetë publik dhe përmban detajet kryesore të alokimit të planifikuar, duke përfshirë bandat e frekuencave dhe objektivat kryesore që synohen të arrihen.
6. Në rastin kur në përfundim të konsultimit publik AKEP arrin në konkluzionin që nuk është i nevojshëm kufizimi në numër i të drejtave dhe kur nuk është në kundërshtim me interesin e përdoruesve ose të zhvillimit të konkurrencës ekonomik, i propozon ministrit dhënien e të drejtave të përdorimit në përputhje me parashikimet e nenit 68, të ligjit Nr. 54/2024, kundrejt pagesës së çmimit rezervë të miratuar nga ministri bazuar në propozimin e AKEP.

Neni 4

Parime të përgjithshme

1. Procedura e konkurrimit publik për dhënien e autorizimeve individuale për të drejtat e përdorimit të frekuencave me një numër të kufizuar në Republikën e Shqipërisë, bazohet në parimet e objektivitetit, ligjshmërisë, transparencës, mosdiskriminimit, përdorimit eficient të frekuencave dhe konkurrencës së ndershme.
2. Procedurat e konkurrimit publik për dhënien e autorizimeve individuale për të drejtat e përdorimit të frekuencave me një numër të kufizuar në Republikën e Shqipërisë, është procedurë e hapur përzgjedhëse dhe duhet të garantojë sigurinë dhe integritetin e rrjeteve të komunikimeve elektronike, kërkesat për mbulim, cilësinë e ofrimit të shërbimeve, vazhdimësinë e ofrimit të shërbimeve universale, mbrojtjen e interesave të përdoruesve dhe trajtimin e barabartë të ofertuesve.
3. Procedura e konkurrimit publik merr në konsideratë, midis të tjerash, aspektet ekonomike, të sigurisë, të shëndetit, interesit publik, lirisë së shprehjes, kulturës, shkencës, aspektet teknike dhe sociale të politikave kombëtare, si dhe interesat e komunitetit përdorues të spektrit radio,

me qëllim optimizimin e përdorimit të spektrit radio, duke shmangur interferencat e dëmshme.

4. Procedurat e konkurrimit publik për dhënien e autorizimeve individuale për të drejtat e përdorimit të frekuencave me një numër të kufizuar në Republikën e Shqipërisë, zbatojnë parimin “*përdore spektrin ose e humbet të drejtën e përdorimit*”.
5. Procedura e konkurrimit publik, zhvillohet në përputhje me këto rregulla dhe ligjin nr. 54/2024, “Për komunikimet elektronike në Republikën e Shqipërisë”.

Neni 5

Objektivat e konkurrimit publik

1. Procedura e konkurrimit publik synon arritjen e objektivave të përgjithshëm politike të përcaktuara në nenin 5 dhe 7 të ligjit nr. 54/2024.
2. Objektivat e konkurrimit publik përfshijnë:
 - a) promovimin e mbulimit;
 - b) sigurimin e kërkesave të cilësisë së shërbimit;
 - c) promovimin e përdorimit eficient të spektrit të frekuencave duke marrë në konsideratë kushtet që i bashkëlidhen të drejtës së përdorimit dhe nivelin e pagesës;
 - d) promovimin e inovacionit dhe zhvillimin e biznesit;
 - e) nxitjen e investimeve në rrjetet dhe shërbimet me kapacitet shumë të lartë, përfshirë rrjetet e gjeneratës së ardhshme;
 - f) promovimin e konkurrencës efektive dhe të qëndrueshme në tregun e komunikimeve elektronike;
 - g) shmangien e akumulimit të spektrit në dëm të konkurrencës dhe hyrjeve të reja në treg.
 - h) sigurimin e mbulimit të gjerë me shërbime të komunikimeve elektronike në të gjithë territorin dhe popullsinë e Republikës së Shqipërisë, me cilësi dhe shpejtësi të lartë, duke përfshirë mbulimin e rrugëve kryesore të transportit kombëtar dhe rrjetet e transportit transevropian;
 - i) shpërndarja e spektrit duhet të përmbushë qëllime ekonomike dhe teknike dhe përdorimin eficient dhe efikas të spektrit të frekuencave.

Neni 6

Përzgjedhja e procedurës

1. Procedurat e konkurrimit publik, që ndjek AKEP, për dhënien e autorizimeve individuale për spektrin e frekuencave, janë:
 - a) Procedurë konkurrimi për një brez frekuencash;
 - b) Procedurë konkurrimi me kombinim të brezave të frekuencave (*Multiband*);
2. Procedura “*Multiband*”, ofron mundësinë e konkurimit njëkohësisht për të drejtat e përdorimit në disa breza frekuencash në një proces të vetëm konkurrimi.
3. AKEP në propozimin që i paraqet ministrit sipas nenit 3, të këtyre rregullave, propozon dhe llojin e procedurës së konkurrimit që do zbatohet sipas pikës 1, të këtij neni. Propozimi i AKEP duhet të jetë i arsyetuar.

KREU III

ZHVILLIMI I PROCEDURAVE TË KONKURRIMIT PUBLIK

Neni 7

Faza Paraprake e Pjesëmarrjes dhe Dhënia e Informacionit

1. Përpara fillimit të fazës zyrtare të aplikimit dhe kualifikimit, AKEP mund të organizojë një fazë paraprake pjesëmarrjeje me qëllim informimin dhe lehtësimin e përgatitjes së palëve të interesuara.
2. Kjo fazë do të përfshijë, por pa u kufizuar në:
 - a) **Publikimin e njoftimeve paraprake:** Njoftime për qëllimin e zhvillimit të konkurrit, afatet kohore të pritshme dhe bandat e frekuencave të synuara. Këto njoftime do të bëhen të paktën **dy (2) muaj** përpara fillimit të fazës së aplikimit.
 - b) **Sesione informuese:** Takime publike ose online për të shpjeguar objektivat e konkurrit, formatin e propozuar, kushtet kryesore dhe detyrimet e mundshme. Këto sesione do të mbahen brenda **një (1) muaji** nga publikimi i njoftimeve paraprake.
 - c) **Mundësinë për kërkesa paraprake për sqarime:** Një periudhë prej të paktën **dy (2) javësh** pas sesioneve informuese, gjatë së cilës palët e interesuara mund të paraqesin pyetje fillestare lidhur me procesin e konkurrit ose specifikimet e frekuencave. AKEP do të publikojë përgjigjet në mënyrë transparente.
 - d) **Qasjen në dokumente paraprake:** Vënia në dispozicion e dokumenteve jo-detyruese, si draft-rregullore, studime tregu, ose informacione teknike paraprake, për të ndihmuar palët e interesuara në vlerësimin e mundësive. Këto dokumente do të jenë të aksesueshme që nga publikimi i njoftimeve paraprake.
 - e) **Shprehja e interesit:** Mundësinë për palët e interesuara për të regjistruar formalisht interesin e tyre për të marrë pjesë në ankand, pa asnjë detyrim për pjesëmarrje përfundimtare.
3. Të gjitha aktivitetet dhe informacionet e ofruara gjatë kësaj faze paraprake do të jenë transparente dhe të aksesueshme publikisht, duke siguruar barazi informacioni për të gjitha palët.

Neni 8

Zhvillimi i Procedurës së Konkurrimit

1. AKEP, miraton dokumentin e konkurrit publik, i cili përfshin:
 - a) **Informacione të përgjithshme mbi:**
 - kuadrin ligjor të zbatueshëm;
 - formularin e njoftimit;
 - formularin e ofertës financiare;
 - kriteret e përgjithshme të pjesëmarrjes dhe kualifikimit;

- formularin e sigurimit të ofertës;
 - formularin e njoftimit të fituesit
 - formularin e skualifikimit të ofertuesve;
 - formularin për botimin e fituesit;
- b) **Informacione specifike** për:
- përcaktimin e frekuencës/brezit të frekuencave
 - vlerën minimale të frekuencës/brezit të frekuencave
 - autorizimin e përgjithshëm;
 - autorizimin individual për përdorimin e frekuencave;
 - njoftimin dhe regjistrimin;
 - numeracionin;
 - interkoneksionin dhe aksesin;
 - informacion mbi tregun e komunikimeve elektronike në Republikën e Shqipërisë;
 - informacion i përgjithshëm për Shqipërinë (aspektet ekonomike, sociale, politike, etj);
 - mënyrat e pagesës për autorizimin individual;
 - Kushtet që i bashkëlidhen autorizimit individual;
 - etj.
- c) Në rastin e zbatimit të procedurës me kombinim të brezave të frekuencave (*Multiband*), informacionet specifike sipas shkronjës b) të këtij neni, jepen për secilin brez të përfshirë në kombinimin e brezave, në veçanti për përcaktimin e sasisë së frekuencave, vlerën minimale për brezin apo lotin përkatës.

Neni 9

Njësia e hartimit të dokumentave dhe urdhri për zhvillimin e konkurrimit publik

1. AKEP, siguron një ndarje të qartë të detyrave të personave të përfshirë në hartimin e dokumentit të konkurrimit publik dhe atyre të përfshirë në procesin e vlerësimit të ofertave. Kërkesat ligjore për parandalimin e konfliktit të interesit, sipas legjislacionit në fuqi, duhet të mbahen parasysh përpara emërimit të një anëtarit në njësinë e hartimit të dokumentacionit. Çdo person i përfshirë në procesin e zhvillimit të konkurrimit publik nënshkruan një deklaratë, përmes së cilës deklaron se nuk ndodhet në kushtet e konfliktit të interesit.
2. Për zhvillimin e procedurës së konkurrimit publik, të miratuar nga ministri, Kryetari i Këshillit Drejtues të AKEP nxjerr “Urdhrin për zhvillimin e procedurës së konkurrimit publik”, i cili duhet të përmbajë të paktën:
 - i. objektin e konkurrimit publik;
 - ii. procedurën e miratuar nga ministri; përfshirë dhe miratimin për mënyrat e pagesës
 - iii. përbërjen e njësive të hartimit të dokumenteve.
3. Njësia e Hartimit të Dokumenteve, është përgjegjëse për hartimin e dokumentit të konkurrimit publik, hartimin dhe dërgimin e njoftimeve brenda afateve të parashikuara nga ky vendim, mbledhjen dhe administrimin e dokumenteve të nevojshëm që kanë të bëjnë me konkurrimin publik.
4. Përpara zhvillimit të procedurës së konkurrimit publik, AKEP, njofton publikisht për kryerjen e tij.

- a) Njoftimi për konkurrim publik botohet të paktën një herë në një gazetë me qarkullim ndërkombëtar, kur është e nevojshme, dhe dy herë në gazetë kombëtare/media.
- b) Njoftimi publik shpallet edhe në faqen zyrtare të AKEP.
- 5. Njoftimi për konkurrim publik, përfshin të gjitha informacionet, që u lejojnë subjekteve të interesuar, të vendosin nëse do të marrin pjesë apo jo në procedurat e konkurrencës publik:
 - a) afatin kohor brenda të cilit do të të dërgohen ofertat;
 - b) vendin dhe adresën ku do të dërgohen ofertat;
 - c) gjuhën ose gjuhët, në të cilat duhet të hartohen ofertat;
 - d) mënyrën dhe kushtet për marrjen e dokumentit të konkurrencës publik;
- 6. Ftesa për ofertë, përmban informacion por, pa u kufizuar, për:
 - a) objektin e konkurrencës publik;
 - b) kushtet, kërkesat kualifikuese të kandidatëve;
 - c) vlerën minimale të tregut për frekuencën ose brezin e frekuencave;
 - d) afatin përfundimtar dhe mënyrën e dërgimit të ofertave dhe dokumenteve që i bashkëlidhen;
 - e) adresën, vendin, datën dhe kohën e hapjes publike të ofertave;
 - f) personin e kontaktit;
 - g) si dhe çdo informacion tjetër që AKEP e vlerëson të dobishëm.

Neni 10

Komisioni i Vlerësimit të Ofertave

1. Komisioni i vlerësimit të ofertave (KVO), caktohet nga AKEP dhe përbëhet nga jo më pak se 4 (katër) përfaqësues të AKEP specialistë të fushës përkatëse, 1 (një) përfaqësues i ministrisë përgjegjëse për komunikimet elektronike, 1 (një) përfaqësues i Ministrisë së Financave dhe 1 (një) përfaqësues i Ministrisë së Drejtësisë.
2. KVO, është përgjegjës për shqyrtimin dhe vlerësimin në tërësi të aplikimeve të ardhura në kuadër të procedurës së konkurrencës publik. Në çdo rast numri i anëtarëve duhet të jetë tek.
3. Personat përgjegjës për hartimin e dokumentit të tenderit, nuk mund të emërohen anëtarë të Komisionit të Vlerësimit të Ofertave.
4. Kryetari i Komisionit duhet të përzgjidhet mes zyrtarëve të lartë drejtues të AKEP dhe është plotësisht përgjegjës për organizimin e punës menjëherë pas krijimit të komisionit.
5. Komisioni duhet të zbatojë detyrat e tij në pavarësi të plotë dhe nëse kërkohet ndonjë sqarim në lidhje me dokumentin e tenderit, këto merren nga njësia për hartimin e dokumenteve. Komisioni nuk kryen asnjë veprim tjetër përveç atyre të përcaktuar shprehimisht në këtë vendim.
6. Nuk mund të marrin pjesë në KVO, personat që përbëjnë konflikt interesi me ofertuesit sipas kuptimit të ligjit “Për konfliktin e interesit”.
7. Çdo anëtar i KVO, nënshkruan një deklaratë përmes së cilës deklaron se nuk ndodhet në kushtet e konfliktit të interesit.
8. Anëtarët e Komisionit dhe çdo person që ka marrë pjesë në procedurën e hartimit të dokumenteve, kanë detyrimin të ruajnë konfidencialitetin e përmbajtjes së ofertës.
9. KVO, në përfundim të procedurës së konkurrencës publik, dorëzon pranë AKEP, raportin përmbledhës të procedurës së konkurrencës publik, i cili përmban:

- a) objektin e konkurrimit publik;
- b) përmbledhje të procedurës së ndjekur;
- c) numrin e aplikimeve të paraqitura dhe një përmbledhje për secilin aplikim
- d) kriteret e vlerësimit
- e) renditjen e kandidatëve sipas vlerësimit të bërë nga komisioni;
- f) ankesat, nëse ka pasur;
- g) shpalljen e fituesit

Neni 11

Kriteret detyruese për skualifikim

1. Kandidatët për të marrë pjesë në procedurën e konkurrimit publik, duhet të vërtetojnë se:
 - a) janë shoqëri aksionere ose persona juridikë, të ngjashëm sipas legjislacionit të vendit ku ato janë krijuar, dhe janë të regjistruara tek autoritetet përgjegjëse ku ndodhet selia.
 - b) Mund të paraqesin oferta edhe bashkime investitorësh që veprojnë së bashku për qëllime të pjesëmarrjes në konkurrim publik dhe që synojnë të kryejnë transaksionin nëpërmjet një shoqërie që do të krijohet.
 - c) janë të padënuar, me vendim gjykate të formës së prerë, për kryerje e njëres nga veprat:
 - pjesëmarrje në grup të strukturuar kriminal, organizatë kriminale, bandë e armatosur, organizatë terroriste, sipas përcaktimeve të legjislacionit në fuqi;
 - korrupsion sipas përcaktimeve të legjislacionit në fuqi;
 - mashtrim sipas përcaktimeve të legjislacionit në fuqi;
 - pastrim parash ose financim të terrorizmit sipas përcaktimeve të legjislacionit në fuqi;
 - vepra me qëllime terroriste ose vepra penale të lidhura me veprimtari terroriste, sipas përcaktimeve të legjislacionit në fuqi;
 - falsifikim;
 - puna e fëmijëve dhe forma të tjera të trafikimit të qenieve njerëzore sipas përcaktimeve të legjislacionit në fuqi.
 - e) Nuk kanë detyrime të pashlyera në lidhje me pagesën e sigurimeve të detyrueshme shëndetësore dhe shoqërore si dhe ndaj organeve tatimore si dhe çdo detyrim tjetër ndaj shtetit shqiptar;
 - f) Nuk kanë falimentuar ose janë subjekt të procedurave të falimentimit.
2. Të gjitha kërkesat e pikës 1, të këtij neni duhet të vërtetohen nëpërmjet certifikatave zyrtare nga autoritetet përkatëse ose me anë të dokumenteve të tjera zyrtare, të lëshuara jo më herët se 30 ditë kalendarike përpara njoftimit për zhvillimin e konkurrimit publik, original ose fotokopje të noterizuara. Nëse dokumentet e sipërpërmendura, për kandidatët ose ofertuesit e huaj, nuk lëshohen në shtetin e tyre të origjinës, atëherë mjafton një deklaratë me shkrim nga kandidati ose ofertuesi. Ofertuesit e huaj do t'i nënshtrohen një vlerësimi apo shqyrtimi sipas rregullave dhe procedurave të miratuara në zbatim të ligjit për investimet e huaja të ndryshuar në përputhje me rregulloren e BE-së EU 2019/452/EU.
3. AKEP, kur kërkohet informacion për kandidatin ose ofertuesin rezident në një shtet të huaj, mund të kërkojë bashkëpunimin e autoriteteve përkatëse.
4. Në rastin e dhënies në përdorim të brezave të frekuencave për rrjetet celulare, për futjen në treg të operatorëve të rinj, vendoset kusht për përjashtimin nga pjesëmarrja në konkurrimin

publik të të gjithë operatorëve të autorizuar për përdorimin e këtyre brezave, si dhe ortakëve të tyre të çdo lloji.

5. Ofertuesi nuk duhet të ketë anëtare të bordit, ose nivelet drejtuese, persona për të cilët ka vendim për masa shtrënguese nga Shqipëria ose në BE.
6. Mosplotësimi i njërit prej kërkesave të sipërpërmendura në këtë nen, përbën shkak për skualifikimin e kandidatit ofertues pjesëmarrës në konkurrimin publik.

Neni 12

Kërkesa për kualifikim

1. Kandidatët e interesuar për të marrë pjesë në procedurën e konkurimit publik, kualifikohen në fazën e parë, pasi të kenë përmbushur kriteret e mëposhtme, që AKEP i vlerëson të nevojshme për sa kohë që ato janë në pajtueshmëri me natyrën dhe përmasat e autorizimit individual që do të jetë objekt konkurrimi dhe jo diskriminuese:
 - a) Kualifikimi profesional
 - i. Kandidatët duhet të vërtetojnë se zotërojnë njohuri të përgjithshme në fushën e komunikimeve elektronike si dhe njohuri profesionale dhe eksperiencë mbi shfrytëzimin e frekuencave dhe teknologjitë që operojnë në atë brez, përkatësisht për brezin objekt konkurrimi.
 - b) Aftësitë teknike
 - i. Kandidatët duhet të paraqesin planin për shtrirjen dhe konfigurimin e rrjetit që do të ndërtohet dhe do të operojë në frekuencën/brezin e frekuencave që është objekt tenderimi.
 - ii. Kandidatët duhet të paraqesin planin e tyre në lidhje me shërbimet, cilësinë e shërbimeve dhe/ose tarifat për shërbimet që do të ofrohen nëpërmjet rrjetit që do të operojë në frekuencën/brezin e frekuencave që është objekt tenderimi, në varësi të rastit.
 - iii. Kandidatët duhet të garantojnë shfrytëzimin e frekuencave në përputhje me rekomandimet dhe standardet e ITU dhe CEPT.
 - c) Besueshmëria për sigurinë
 - i. Ofertuesit duhet të paraqesin informacion mbi teknologjinë dhe furnizuesit e pajisjeve teknologjike që do të përdorin duke dëshmuar që përmbushin kërkesat ligjore dhe standardet e sigurisë;
 - d) Gjendja ekonomike e financiare
 - i. Ofertuesit vërtetojnë se zotërojnë kapacitete ekonomike e financiare për të përmbushur autorizimin individual, me anë të deklaratave bankare ose, kur nevojitet nëpërmjet bilanceve financiare ose pjesëve të shkëputura nga bilancet, një deklaratë të xhiros së përgjithshme të shoqërisë dhe, në rast nevojë, të xhiros së realizuar nga veprimtaritë e ngjashme për një periudhë deri në tre vitet e fundit financiare. Përfshihen nga detyrimi i dorëzimit të bilanceve dhe deklarata e xhiros së përgjithshme të shoqërisë, kandidatët të cilët kanë filluar ushtrimin e aktivitetit në vitin financiar në vijim.
 - e) Kapacitetet ligjore
 - ii. Ofertuesit duhet të vërtetojnë se kanë zotësinë juridike për të përmbushur

detyrimet e marrjes së autorizimit individual, përmes paraqitjes së certifikatës së rregjistrimit në rregjistrat tregtarë ose në rastet e bashkimit të shoqërive vërtetojnë se i gëzojnë këto veti në kohën e marrjes së autorizimit individual.

2. AKEP, është përgjegjës për përcaktimin e kërkesave të përgjithshme për kualifikim dhe kërkesat specifike në varësi të objektit të konkurrimit publik (në varësi të frekuencës/brezit të frekuencave që do të jepet në përdorim).
3. Kërkesat teknike dhe profesionale, synojnë të garantojnë shfrytëzimin e frytshëm dhe efektiv të spektrit, si dhe përmbushjen e objektivave të zhvillimit të sektorit në raste të veçanta.
4. Dokumentacioni, në përmbushje të kërkesave të përgjithshme për kualifikim, do të paraqitet me shkrim dhe i shoqëruar me një deklaratë nga ofertuesi se, në rast se fiton të drejtën e përdorimit, do të respektojë përcaktimet në përgjigje të këtyre kërkesave. Deklarimet në përgjigje të kërkesave të përgjithshme për kualifikim, bëhen pjesë përbërëse e autorizimit nëse ofertuesi do të rezultojë i suksesshëm në marrjen e autorizimit.
5. Skualifikimi i kandidatëve
 - a) AKEP, skualifikon në çdo kohë kandidatët ose ofertuesit, që paraqesin të dhëna të rreme ose një dokument të falsifikuar, për qëllime kualifikimi, gjatë një procedure konkurrimi publik.
 - b) AKEP, skualifikon çdo kandidat apo ofertues, ndaj të cilit është marrë vendimi i përjashtimit nga procedurat e prokurimit publik dhe ankandi, sipas legjislacionit përkatës.
6. Anullimi procedurës së konkurrimit publik
 - a) AKEP lejohet që, në çdo kohë, të anulojë procedurën e konkurrimit publik, për arsye të interesit publik, duke respektuar parimet e barazisë dhe të transparencës. AKEP në asnjë rast nuk është i detyruar të shpallë fituesin për një procedurë konkurrimi publik.
 - b) AKEP nuk mban asnjë përgjegjësi për vendimin e marrë ndaj kandidatëve, që kanë paraqitur dokumentacion, sipas përcaktimeve këtij neni.
 - c) AKEP, u komunikon të gjithë kandidatëve ose ofertuesve vendimin dhe arsyet për anullimin e procedurës së konkurrimit publik, brenda 5 (pesë) ditëve kalendarike nga marrja e vendimit, dhe këtë njoftim e publikon në faqen e tij të internetit.
7. Paraqitja dhe pranimi i dokumentacionit.
 - a) Kandidatët paraqesin dokumentacionin në përputhje me udhëzimet dhe kushtet e përcaktuara në dokumentin e konkurrimit publik, i cila përfshin:
 - iii. pranimin, prej kandidatëve, të kushteve të përcaktuara në njoftimin për konkurrim publik;
 - iv. pranimin, prej kandidatëve të detyrimeve që rrjedhin nga fitimi i procedurës së konkurrimit publik;
 - v. pranimin, prej kandidatëve, të kushteve të dokumentit të konkurrimit publik
8. AKEP përcakton vendin, datën dhe orën e paraqitjes së dokumentacionit.
9. Kur AKEP, bën ndryshime në dokumentin e konkurrimit publik, njofton menjëherë të gjithë kandidatët, që kanë tërhequr dokumentet.
10. Dorëzimi i dokumentacionit
 - a) Dokumentacioni, dorëzohet me shkrim, dorazi ose përmes postës, i nënshkruar dhe vulosur, i mbyllur në zarf, sipas përcaktimeve të dokumentit të konkurrimit publik
 - b) AKEP, sipas kërkesës, pajis kandidatët me numrin e protokollit dhe datën e dorëzimit të dokumentacionit.

- c) Dokumentacioni i dorëzuar, në mbarim të afatit përfundimtar të dorëzimit të tij, i kthehet i pahapur kandidatit që i ka dorëzuar. Të gjitha shpenzimet e kryera nga kandidati, për përgatitjen e dokumentacionit, nuk rimbursohen.
- d) Afatet kohore për dorëzimin e dokumentacionit të përmenduar në pikat 1, 2,3, dhe 4 të këtij neni, është jo më shumë se 30 (tridhjetë) ditë kalendarike nga data në të cilën është botuar/publikuar “Njoftimi i konkurrimit publik”, nga AKEP.

12. Sigurimi i ofertës

- a) Vlera e kërkuar e sigurimit të ofertës, duhet të jetë 2% e vlerës monetare minimale të tregut për frekuencën, të përcaktuar nga AKEP.
- b) AKEP duhet të specifikojë në dokumentin e konkurrimit publik, çdo kërkesë për natyrën, formën, vlerën dhe kushtet e tjera thelbësore të sigurimit të ofertës.
- c) AKEP, nuk pretendon vlerën e sigurimit të ofertës dhe e kthen menjëherë mbrapsht atë, nëse:
 - i. ka përfunduar afati kohor i sigurimit të ofertës;
 - ii. është anuluar procedura e konkurrimit publik, pa u shpallur fituesi.

13. Vlefshmëria, ndryshimi dhe tërheqja e ofertave

- a) Një ofertë është e vlefshme nëse:
 - i. është marrë nga AKEP, në zyrat e tij në Tiranë, në datën dhe kohën e përcaktuar në dokumentin e konkurrimit publik;
 - ii. kandidati plotëson kërkesat e njoftimit për konkurrim publik;
 - iii. kandidati jep garancitë e nevojshme;
 - iv. kandidati nuk është skualifikuar sipas parashikimeve të këtij vendimi.
- b) ofertat janë të vlefshme gjatë periudhës kohore të specifikuar në dokumentin e konkurrimit publik.
- c) AKEP, përpara përfundimit të periudhës së vlefshmërisë së ofertave, mund t’u kërkojë kandidatëve të zgjasin këtë periudhë për një afat të caktuar. Në këtë rast:
 - i. kandidati mund të refuzojë kërkesën, pa humbur sigurimin e ofertës dhe vlefshmëria e ofertës së tij përfundon me mbarimin e periudhës fillestare të vlefshmërisë;
 - ii. kur kandidati pranon zgjatjen e periudhës së vlefshmërisë, me të zgjatet edhe sigurimi i ofertës apo paraqitet një sigurim i ri oferte, që mbulon periudhën e zgjatur të vlefshmërisë. Kandidati, i cili nuk zgjat periudhën e sigurimit të ofertës, ose që nuk paraqet një sigurim të ri oferte, vlerësohet se e ka refuzuar kërkesën për zgjatje të periudhës së vlefshmërisë së ofertës.

14. Hapja e dokumentacionit

- a) Hapja dhe shqyrtimi i dokumentacionit, bëhet nga Komisioni i Vlerësimit të Ofertave (KVO), përbërja, të drejtat dhe detyrat e të cilit përcaktohen në këtë vendim.
- b) KVO, hap të gjitha aplikimet në datën, vendin dhe kohën e përcaktuar, pas mbarimit të afatit përfundimtar për paraqitjen e tij, ose pas mbarimit të afatit përfundimtar të përcaktuar, pas zgjatjes së këtij afati, në përputhje me procedurat e specifikuara në dokumentin e konkurrimit publik.
- c) Emri, adresa e kandidatit, aplikimi i të cilit hapet, dokumentacioni ligjor, teknik, profesional, financiar dhe çdo dokument i kërkuar nga AKEP, lexohen me zë të lartë për personat e pranishëm dhe regjistrohen në procesverbalin e procedurës së konkurrimit publik.
- d) Procesverbali duhet t’i vihet menjëherë në dispozicion, në bazë të kërkesës, çdo

kandidati.

- e) Njësia e hartimit të dokumenteve është e pranishme gjatë hapjes dhe vlerësimit të dokumentacionit, por anëtarët e saj nuk kanë të drejtë të votojnë ose të ndikojnë në procesin e shqyrtimit. Ata mund të japin mendime vetëm kur u kërkohet, si dhe kryejnë funksione të karakterit ndihmës.

Neni 13

Shqyrtimi i aplikimeve dhe parakualifikimi

1. Pas hapjes dhe leximit të dokumentacionit, KVO, zhvillon një proces parakualifikimi për të verifikuar përmbushjen e kriterëve të përcaktuara në nenet 11 dhe 12, të këtij vendimi.
2. KVO, kur e shikon të arsyeshme, u kërkon kandidatëve, sqarime me shkrim për shqyrtimin dhe vlerësimin sa më të drejtë të dokumentacionit të paraqitur në procedurën e konkurrimit publik.
3. Nuk duhet të kërkohet, ofrohet apo lejohet asnjë ndryshim në përmbajtjen e sigurimit të ofertës, përfshirë ndryshimet në çmim apo ndryshime që synojnë të kthejnë një ofertë të pavlefshme në të vlefshme.
4. KVO, vlerëson se një aplikim është i vlefshëm edhe nëse ai përmban devijime të vogla, të cilat nuk ndryshojnë materialisht ose nuk devijojnë nga karakteristikat, kushtet dhe kërkesat e tjera, të përcaktuara në dokumentin e konkurrimit publik, apo gabime, të cilat mund të korrigjohen pa prekur përmbajtjen e saj.
5. KVO, nuk pranon një aplikim:
 - a) kur kandidati nuk pranohet për shkaqe të përcaktuara në këtë vendim;
 - b) kur dokumentacioni i tij, nuk përputhet me specifikimet e përcaktuara në dokumentin e konkurrimit publik.
6. Në përfundim të procesit të shqyrtimit dhe vlerësimit të dokumentacionit, KVO, njofton të gjithë kandidatët pjesëmarrës për rezultatet e kësaj faze dhe përgatit listën e kandidatëve që kanë përmbushur me sukses këtë fazë.
7. Çdo kandidat i interesuar, brenda 5 (pesë) ditëve kalendarike nga data në të cilën është njoftuar, ka të drejtën e ankimit pranë AKEP.
8. Në përfundim të afateve të ankimit, AKEP, njofton kandidatët e parakualifikuar, që të dorëzojnë ofertat ekonomike, si kusht për vijimin e fazës tjetër të kualifikimit.
9. Në çdo rast, afati për përfundimin e fazës së parë të kualifikimit nuk do të kalojë 2 (dy) muaj nga data e publikimit të dokumentit të konkurrimit publik.

Neni 14

Dorëzimi i ofertës ekonomike

1. Kandidatët që kanë kaluar fazën e parakualifikimit, dorëzojnë nw AKEP, ofertat ekonomike brenda 7 (shtatë) ditëve kalendarike, nga data në të cilën janë njoftuar, në përputhje me nenin 15 të këtij vendimi. Ofertat do të hapen në datën dhe orën e specifikuar në Dokumentin e Konkurrimit Publik.

2. Ofertat do të jenë të pakthyeshme pasi të dorëzohen në një raund, përveç rasteve kur specifikohet ndryshe në Dokumentin e Konkurrimit Publik.
3. AKEP, ruan informacionin konfidencial të komunikuar nga një kandidat ose një ofertues që merr pjesë në procedurën e konkurrimit dhe nuk e shpërndan atë, pa pëlqimin e këtij të fundit.
4. Në rast se dy ose më shumë ofertues paraqesin oferta monetare të barabarta dhe më të larta për të njëjtin lot spektri, përcaktimi i ofertës fituese do të bëhet në përputhje me nenin 15 të këtyre rregullave.

Neni 15

Përcaktimi i Fituesve dhe Çmimeve

1. AKEP do të përcaktojë ofertuesin fitues dhe çmimet përfundimtare për çdo lot spektri në përputhje me kriteret e dhënies të specifikuara në Dokumentin e Konkurrimit publik.
2. Për çdo lot spektri, fitues do të shpallet ofertuesi që ka dorëzuar ofertën monetare më të lartë dhe të vlefshme.
3. Ofertë e vlefshme cilësohet vetëm ajo që është më e lartë ose e barabartë me Çmimin Rezervë (minimal) të përcaktuar për atë lot.
4. Në rast se dy ose më shumë ofertues paraqesin oferta me vlere të barabartë për të njëjtin lot spektri, AKEP zbaton një nga mekanizmat e mëposhtëm për zgjidhjen e barazisë, i cili do të jetë specifikuar qartë në Dokumentin e Konkurrimit, konkretisht:
 - a) **Raund Shtesë Ofertimi (Tie-Break Round):** Vetëm ofertuesit me oferta të barabarta do të ftohen të marrin pjesë në një raund shtesë ofertimi, me rregulla të përcaktuara qartë (p.sh., raund me ofertë të mbyllur, ose raund me rritje minimale). Ky raund do të zhvillohet brenda 5 (pesë) ditëve kalendarike nga përfundimi i fazës së ofertës. Nëse pas këtij raundi shtesë, barazia vazhdon, do të kalohet te kriteret dytësore të paracaktuara.
 - b) **Kriteret Dytësore të Paracaktuara:** Nëse raundi shtesë nuk është i zbatueshëm ose nuk zgjidh barazinë, do të përdoren kriteret dytësore të paracaktuara, të cilat do të aplikohen sipas rendit të mëposhtëm, siç do të specifikohet në Dokumentin e Konkurrimit Publik:
 - i. **Detyrimet e Mbulimit:** Oferta që parashikon detyrime më ambicioze të mbulimit (p.sh., përqindje më të lartë të popullsisë/territorit, mbulim në zona më të vështira gjeografike, ose afate më të shkurtra për arritjen e objektivave të mbulimit). Këto detyrime duhet të jenë të matshme dhe të verifikueshme.
 - ii. **Angazhimet për Cilësinë e Shërbimit (QoS):** Oferta që ofron angazhime më të larta për cilësinë e shërbimit, përtej minimumit të kërkuar (p.sh., shpejtësi mesatare më të lartë të dhënave, vonesë më të ulët, disponueshmëri më të lartë të rrjetit). Këto angazhime duhet të jenë të specifikuara dhe të matshme.
 - iii. **Data dhe Ora e Dorëzimit të Ofertës:** Oferta e dorëzuar më herët në raundin përfundimtar të ofertimit (në rastet kur sistemi i ankandit regjistron me saktësi kohën e dorëzimit dhe ky kriter është specifikuar si zgjidhës i barazisë).

- c) Si mjet i fundit, nëse të gjitha mekanizmat e mësipërm nuk arrijnë të zgjidhin barazinë, AKEP mund të përdorë një short të rastësishëm dhe transparent. Shorti do të kryhet në prani të ofertuesve të interesuar ose përfaqësuesve të tyre, dhe i gjithë procesi do të dokumentohet plotësisht.
- 5. Përcaktimi i fituesit/sve dhe çmimeve të dhënies së autorizimeve bëhet brenda 1 (një) muaji nga përfundimi i fazës së ofertës.
- 6. AKEP hartom një raport të detajuar të vlerësimit të ofertave ekonomike, i cili përmban analizën e ofertave dhe arsyetimin e vendimit të dhënies së autorizimit individual.

Neni 16

Rishikimi administrativ dhe afatet e ankimit

1. Çdo kandidat, mund të kërkojë rishikim administrativ të procesit të konkurrimit publik, kur gjykon se një vendim i AKEP është marrë në kundërshtim me ligjin nr. 54/2024 “Për komunikimet elektronike në Republikën e Shqipërisë” dhe rregullat e përcaktuara në këtë vendim.
2. Ankesa paraqitet pranë Këshillit Drejtues të AKEP, brenda 5 (pesë) ditëve kalendarike nga data kur ankimuesi është vënë në dijeni ose duhet të ishte vënë në dijeni për shkeljen e pretenduar, sipas këtij vendimi.
3. Me marrjen e ankesës me shkrim, AKEP, sipas rastit, pezullon vazhdimin e procedurës së konkurrimit publik ose nxjerrjen e një vendimi, derisa ankesa të jetë shqyrtuar plotësisht.
4. Këshilli Drejtues i AKEP, shqyrton ankesën dhe merr një vendim të arsyetuar brenda 5 ditëve kalendarike nga marrja e ankesës.
5. Vendimi i AKEP, i njoftohet ankuesit jo më vonë se 3 (tre) ditë kalendarike nga marrja e këtij vendimi.
6. Kundër vendimit të AKEP, mund të bëhet ankim në Gjykatën kompetente, ku ka selinë organi administrativ.

Neni 17

Ndërprerja e procesit së përzgjedhjes së fituesit

1. Për të vazhduar procesin e përzgjedhjes së fituesit, në vijim të procedurës së konkurrimit publik, duhet që numri i ofertave të vlefshme të jetë më i madh se numri i të drejtave të përdorimit të frekuencave objekt konkurrimi, në të kundërt procedura ndërpritet dhe fillon një procedurë e re.
2. AKEP, përpara fillimit të procedurës së re, sipas parashikimit të pikës 1, të këtij neni, analizon shkaqet që shkaktuan dështimin e procedurës së parë dhe i korrigjon ato, me qëllim që të bëjë të mundur rritjen e konkurrencës.

KREU IV

DHËNIA DHE DETYRIMET E AUTORIZIMIT INDIVIDUAL

Neni 18

Njoftimi i fituesit dhe dhënia e Autorizimit Individual

1. AKEP, pas miratimit të raportit përmbledhës dhe me mbarimin e afateve të procedurës ankimore, njofton fituesin në rrugë shkresore.
2. AKEP dhe ofertuesi fitues, nënshkruajnë autorizimin individual brenda 10 (dhjetë) ditëve kalendarike nga njoftimi i fituesit, periudhë e cila nuk duhet të tejkalojë afatin e vlefshmërisë së ofertës, të përcaktuar në njoftimin dhe dokumentet e konkurrimit publik.
3. Autorizimi individual hyn në fuqi kur nënshkruhet nga ofertuesi fitues dhe nga AKEP dhe pasi fituesi të këtë kryer pagesat e parashikuara në dokumentet e konkurrimit publik.
4. Kur ofertuesi fitues nuk arrin të nënshkruajë autorizimin individual, AKEP bën konfiskimin e sigurimit të ofertës dhe njofton ofertuesin e përzgjedhur, sipas radhës në listën e ofertuesve që kanë mbetur nëse diferenca e pikëve ndërmjet ofertës së së ofertuesit fitues dhe asaj të klasifikuar menjëherë pas saj, është jo më e madhë se 10%. Kjo, nuk çënon të drejtën e AKEP, për të refuzuar të gjitha ofertat e mbetura dhe për të anuluar procedurën e tenderit, sipas nenit 12, pikës 6, të këtyre rregullave.
5. Autorizimi individual, i nënshkruar para përfundimit të afatit të njoftimit të fituesit apo para përfundimit të shqyrtimit administrativ, është absolutisht i pavlefshë

Neni 19

Detyrimet pas dhënies së Autorizimit Individual

1. Të drejtat e përdorimit të frekuencave janë subjekt i kushteve të përcaktuara në nenin 31 të ligjit nr. 54/2024 “Për komunikimet elektronike në Republikën e Shqipërisë”.
2. AKEP, mund të caktojë kushte të veçanta për zbatimin e autorizimit individual, për aq kohë sa ato janë të ligjshme dhe të përfshira në njoftimin dhe dokumentin e konkurrimit publik.
3. Kushtet që rregullojnë zbatimin e autorizimit individual, duhet të kenë natyrë jodiskriminuese dhe të jenë në përputhje me objektin e tenderit.
4. Këto detyrime do të jenë ligjërish të detyrueshme dhe subjekt i monitorimit nga AKEP.

KREU V

MONITORIMI I ZBATIMIT TË DETYRIMEVE

Neni 20

Monitorimi dhe Zbatimi

1. AKEP, do të monitorojë vazhdimisht përmbushjen e detyrimeve dhe kushteve të autorizimit individual për përdorim të frekuencave.
2. Në rastet e mospërmbushjes së detyrimeve që rrjedhin nga autorizimi individual, AKEP, do të zbatojë masat e parashikuara në ligjin nr. 54/2024.

KREU VI

Neni 21
Dispozita të veçanta

1. Ofertuesi fitues, pajiset me autorizimin individual vetëm pasi të ketë kryer pagesat e parashikuara sipas ligjit nr. 54/2024 “Për komunikimet elektronike në Republikën e Shqipërisë”.
2. Çmimi i ofertës, i ofruar nga ofertuesi që ka fituar të drejtën e përdorimit të frekuencës/brezit të frekuencave, derdhet prej tij në Buxhetin e Shtetit.
3. Koha e kryerjes së kësaj pagese, përcaktohet në dokumentin e konkurrimit publik.